


Б. ТЕНТЮКОВ



Найō
эз сувтны
пидзōс
вылō



Син. наст. 1962 г.
ЭКЗЕМПЛЯР
Б. Тентюков

Най о эз сувтны пидз о с вы л о

Документальной
повесть

КОМИ КНИЖНОЙ
ИЗДАТЕЛЬСТВО

1 · 9 · 6 · 2



C
T33

ВОДЗКЫВ

«Найö эз сувтны пидзöс вьлö» документальной повестьын висьтавсьö ставыс вöвлöмтор йылысь. Вежлалöма сöмын кодсюрöлысь овъяссö да нимъяссö. Повестьлөн автор ачыс веськавліс фашистскöй пленö, сэсся сэтысь пышйöм бöрын участвуйтис миян страналысь временнö оккупируйтöм территория мездöмын, Берлин штурмуйтöмын.

Сійö ас синнас аддзыліс, кыдзи фашистскöй Германияын быд ногыс издевайтчисны сöветскöй военнопленнöйяс вылын. Гитлеровецъяс кöсьылісны физическöя бырöдны став сöветскöй военнопленнöйясöс. Найö - систематическöя тшыгйöдісны пленнöйясöс да уна миллион

мортос отравитисны газон. Пленной-ясос отравитом могысь стройтома воли специальной газовой камераяс Освенцимын, Треблинкаын, Майданекын, Гусенын, Гросе-Розенын, Флезенбургын да мукод лагерьясын.

Но некутшом издевательствояс да мученияс эз вермыны чегны советской йозлысь духсо, сувтодны найос пидзос выло фашистьяс водзын. И пленын найо унджыкыс тышкасисны врагкод, зилисны пышйыны колючой проволока сайысь, сувтны народной мстительяс радо. Сидз, повестьын висьтавсьо коми военнопленнойяс йылысь, кодьяс волины «Мюльберг 4 Б» да «Гроссбеерен 3 Д» лагерьясын. Найос вуджодалисны оти лагерысь модо, коймодо... И накод пыр воли фашистской неволяын на код жо пленной москвич Иван Петрович Загорский. Сийо чукортис ас гогорыс честной йозысь коллектив да котыртис «Гроссбеерен» лагерса оти командаын саботаж. Загорскийос таысь фашистьяс зверскоя виисны, и сыкод

тшӧтш виисны сыктивкарсаясӧс П. Бессоновӧс, А. Осиповӧс да мукӧдъясӧс. Но татшӧм йӧзлӧн помӧдз тырмисны вынъяс, медым тышкасьны колючӧй проволока сайын олӧм вӧсна, победа вӧсна.

Ӧні, кор американскӧй милитаристъяс зільӧны ӧзтыны выль война да унаторйын босьтӧны пример Гитлерлысь, налы абу лӧк казътыштны фюрерлысь судьбасӧ да сійӧс, мый сӧветскӧй йӧз дасьӧсь быд здукин не сӧмын дорйыны ассьыныс Рӧдинасӧ, но и пасьвартны быдӧнӧс, кодлысьтас кыпӧдны миян вылӧ вирӧсь лапасӧ.



* * *

1941 во. Август төлысса асывводз. Белоруссияса неыджыд железнодорожной станция Лесная кык төлысь чөж нин фашистскöй оккупантыяс киын. Гитлеровскöй комендантыяс лунысь-лун öшöдалöны заборьяс вылö выль да выль приказьяс. То öтитор оз позь вöчны, то мöдтор. Весиг кöть керкасыд ныртö эн мыччыв. И кодлы позис овны улича вылö петавтöг — олісны иганьяс сайын. Кывысисны, мый вöчсьö станциябердса ичöтик посёлокын.

Тайö асывводзнас кутіс нимаवны: фашистыяс лöсьöдчöны мöдöдны Герма-

нияӧ пленнӧйяслысь ыджыд партия. Петан кӧ улича вылӧ, сюран оккупантъяслы син улас. Найӧ ёна оз думыштчывны — тшӧтш тойыштасны пленнӧйяс чукӧрӧ, пуксьӧдасны вагонъясӧ. И нуасны гортсьыд, весиг бать-мамыдкӧд аддзысьлыны оз сетны.

Лӧк юӧрыс збыльмис. Станцияӧ кутісны чукӧртны пленнӧйясӧс. Уна сӧ мортӧс матысса лагерьясысь вайисны ён конвой улын. Немецкӧй салдатъяс чужъялісны тшыг да мудз йӧзӧс, зурйӧдлісны мышканыс прикладъясӧн, мыйӧн сӧмын кодкӧ надзмӧдас воськовсӧ либӧ видзӧдлас бӧрвыв. Паныд веськалысь фашистскӧй офицеръяс индалісны чуньнаныс киссьӧм паськӧма да вирӧсь чужӧмъяса йӧз вылӧ, гораа сералісны.

— Эн на ёна сералӧ! Волас и мян уличаӧ праздник! — кылӧ, надзӧнник шуис колонна юрын восьлалысь морт. Чужӧмыс сылӧн эз нин тыдав бритлытӧм тош увсьыс, синкымъясыс ӧшйӧмаӧсь улӧдз.

— Надзӧнджык... Кыласны! — шуис

сылы орччөн сьöкыда восьлалысь мөд морт. Водзаыс сöмын шеныштис кинас, ещö скöрысьджык видзöдлiс конвоиръяс вылö. «Ок, эськö... кийн кö оружие вöлi!..»— лэдзис сiйö пинь пырыс.

Тошка морт сайын сьöкыда восьлалiс кöртöда юра салдат. Сылөн гимнастёрка вылас уналаын тöдчисны косьмөм вир войтъяс. Орччөн ськөд мунiс кöртöда киа том салдат, кöмтөм. Тайö том мортыс вöлi сэтшөм нин омөль, мый кучик улас тöдчисны ордल्याсыс. Синмыс сылөн мудз, чужöмыс петкөдлiс, мый ас вывтыс том морт нуöма нин зэв унатор.

Кöртöда юра салдатыд тувкис гыр-дзанас орччөн мунысь том мортлы да нюммуноьмөн моз шуис, кöть эськö и нюммуноьмыс сылөн артмис зэв тешкодь: — Виччысьöны тэнсьыд письмöястö гортад, Павел! Регыд нин ми тэкөд гижам... заявление мөдарьюгыдö! Мед кöть примитасны жö!

— Эн нин кöть серав, Иван,— юрсö кыпöдлытöг вочавидзис сiйö, кодöс шу-

исны Павелӧн.— Сідзи нин сьӧлӧм ёнтӧ...
И син водзын ставыс вералӧ. Кӧть вод
да кув...

Павел эз помав: колонна сувтіс. Уна-
ӧн пыр жӧ пуксялісны места выланыс.

— Встать!— кыліс водзысянь лёкысь
горӧдӧм.

— Іос, Іос!¹— Титов вылӧ горӧдіс бы-
лялӧм синма эсэсовец. Иван думыштіс:
«Эн на тэрмась! Абу пӧжар вылынӧсь»,
но, тӧдӧмысь, нинӧм эз лысьт шуны воча,
надзӧник кыпӧдчис.

Гитлеровецызд лёкысь уськӧдчис сы
вылӧ, мый вынсьыс кучкис винтовка при-
кладнас Иванлы чужӧмас. Титов вир
сорӧн сьӧлыштіс вомсьыс чегӧм пиньсӧ,
гимнастёрка соснас чышкыштіс чужӧмсӧ.

Пемдандорыс пленнӧйясӧс вайисны
тыртӧм вагонъяс дінӧ. Тыдалӧ, сэтчӧ на-
йӧс мӧдасны пуксьӧдавын. И збыльысь:
недыр мысти вагонъясӧ йӧзӧс шӧтісны

¹ В а й, в а й!— немецкӧй кыв вылын.

рынышö кольтаясöс моз. Кажитчö, сэсса некод нин оз тöр, но ортсысянь йöзöс пыр суйисны и суйисны. Кыліс конвоиръяслөн горзём, йöзлөн ойгём да пойгём.

Иван Титов крепыда кутчысис Павел киö. Найö öтлаын кайисны вагонö. «Мед көть мый, но абу ас кежын, — думайтис Титов. — Кыкөннад öд и кувнысö гажаджык». Титов да Троянов тöдмасисны пленö сюрём бöрын нин. Павел уджалöма войвылын, Коми республикаын, и найö, роч да коми, лыддисны асьнысö землякъясөн, зілисны кутчысьны öтлаын.

Кузя тутöстис паровоз. Вагонъяс дрөгмунісны. Öдзöсъяс гольсмуніны-пöдласисны. Состав вөрзис места вывсьыс.

Кодкö надзöник шуис:

— Прöщай, ас чужан му! Эн казтьыв миянöс лёкөн.

Кодкö гусьөн, мед эськö некод эз казьяв, бöрдис. Кодкö чышкаліс синвасö.

— Мый шогö усинныд? — кыліс кодлөнкö гөлöс пемыд пельöсын, но сылы

некод эз вочавидз: быдөнлы вөлі шог, сьёкыд.

Вагонын чөв-лөнъыс сулаліс дыр. Пыр өтмоза грымакылісны көлесаяс. Да ещö кыліс, кызди вагон стенъяс сайын öтырышъя кисьтис зэр. Позис гөгөрвоны: ывла вылын ыркыд, а вагонъясын — пöдтымөн жар. Муртса позис лолавны. Быдөн пöсялісны нин брöд ваöдз.

Первойсö Павел, мудзысла да слаблуныс вöсна, мыйкö дыра кезлö унмовсьліс. Но регыд бөр садьмис. Терпитны позьтöма доймис кийс. Вöлөмкö, ки вылас кодкö куйлö, и кийс дзыкöдз позялöма. Кылö, матіникын Титов кодкöдкö надзöник сёрнитö. Сюсьджыка видзöдлөм бöрын Павел тöдіс Титовкöд сёрнитысьсö: ыджыд тошка мортыд.

Титов казяліс Павликлысь вөрзьöдчөмсö, шуис:

— Павел! Тöдмась: Иван Петрович Загорский. Тьöзка менам.

— Троянов!— буркнитис вомгорулас Павел, нюжöдіс дзоньвидза кисö.

— Да, уна бур йөз пропадайтөны,—
гөгөр видзөдлөм бөрын шуис Загорский.
Оз позь вөлі гөгөрвоны, сёрнитіс сійө
став йывсьыс али аслас выль төдсаяс
йылысь сөмын.

Поезд друг сувтіс. Вагонъяс пөлөн
зыкөн да горзігтыр заводитісны котрав-
ны конвоиръяс. Мисьтөма дзуртыштөмөн
воссялісны вагон өдзөсьяс.

— Лыддьөны миянөс,— мыйкө дыра
чөв олөм бөрын шуис Загорский.

И кор поезд выльысь вөрзис, Загор-
ский заводитіс водзө висьтавны:

— Ставыс тайө тадзи прөстө оз коль
немецъяслы. Вот аддылад! Коркө и найө
мөдасны бөр пышйыны миян му вылысь.

— Не овны миянлы сійө лунөдзис!—
шыасис Павел.— Оні эськө вомтыр нянь
көть...

— Велавны колө няньтөг олыштны...
Важөн мед ёнджыка сейин...— серөктіс-
ны бокын.

— Нянь кө колө, эз ков веськавны тат-

чө,— содтіс мөд.— Тышкасьны коліс кув-
төдзид. А тані ми ставөн сгинитам.

— И фронт вылын тышкасим, и тані
кутам тышкасьны,— чорыда шуис Загор-
ский.

Быдөн видзөдлісны сы вылө, ланьтіс-
ны. Вагон улын пыр өтмоза кыліс көле-
саяслөн стучитөмыс.

Павел эз вермы кутны асьсө: мыр-
дысьөн тупкысисны сьөктаммөм син-
кымъясыс. Көсйис нин выльысь дзикөдз
вунөдчивны, но кодлөнкө сьөкыда руж-
тыштөмыс бөр садьмөдіс сійөс. И сэки
кок увсьыс сійө аддзис мортөс, коді теш-
кодя новлөдліс кисө голя увтіыс. Морт-
лөн тшөка улыс вөлі ойдөма вирөн. «Го-
лясө асьыс вундөма»,— повзьөмөн ду-
мыштіс Троянов.

— Митялөн овсис!— кылө, кодкө шуис
надзөникөн.— Öні сылы некутшөм олөм
ни полөм!

Вагонын ланьтісны.

— Ставөн сэтчө воам!— ыщловзис
кодкө.

Кынӧмъяс быдӧнлӧн сямалісны. Код тӧдас, мый эськӧ ӧні быдӧн сетіс нянь кусӧк вылӧ. И уналы юрас воліс дум: гашкӧ, став мучитчӧмыс нинӧмла? Гашкӧ, бурджык вӧчны тайӧ Митяыс моз жӧ?

А поезд грымакылігтырйи муніс водзӧ.

Ӧти остановкаын бара вӧссьыліс вагон ӧдзӧс, конвоиръяс лыддисны йӧзӧс, а сӧсся недыр мысти вайисны нянь. Но кутшӧм нянь вӧлі тайӧ! Пилипызь сора, тупӧсьяс пыткас сӧркни торъяс. Но и тайӧ нин вӧлі нянь — быд квайт морт вылӧ ӧти тупӧсь.

— Куим лун кежлӧ! — висьталісны конвоиръяс.

— Ва мед ваясны! — корис кодкӧ. — Сотчам регыд ставӧн.

Конвоиръяс сӧмын жеръялісны-сералісны.

И вот тупӧсьяс юклісны да вундалісны. Мерайтісны ӧти ног и мӧд ног. Весітісны кусӧкъяссӧ ки вылын и ас вӧчӧм вески вылын. А сӧсся ӧти морт бергӧдчис мышкӧн да горзіс, кодлы кутшӧм кусӧк.

Здук мысти няньыдлөн и дукуыс эз вöv. Весиг крöшкияссö öктисны. Вот тэныд и куим лун кежлö.

Станцияын чуксасисны паровозъяс. Кытöнкö увтчисны понъяс.

— Павел!— Трояновлы шöпнитис Титов.— Пышйыны тайö адсьыс колö! Видлам öшиньöдыс...

Павел видзöдліс Иван вылö, довкнитис юрнас.

Войнас, кор поезд грымакылігтырйи тövзис водзö, Титов заводитис разьны да орьöдлыны öшинь розьысь проволокасö. Киыс регыд вир-сермуні, но эз лэччысь. Сэсса Загорскийкөд öтвылысь найö йötкыштисны öшиньö ортсысянь тувъялөм пövъяссö. Öтлаö көрталісны тасмаяс. На отсöгөн колö вöлі петны öшинь розьöдыс да лэччыны вагонысь муö.

Титов медся первойөн заводитис петны вагонысь. Сюйис юрсö вагон öшиньö, мөдіс кыскыны тушасö. Поезд муніс буретш надзöник, кыр паныд. Друг Титов аддзис орчча вагонысь чеччалысь йөзöс. Дзик

орччөн кыліс лыйём шы. Иван лэдзис кисьыс тасмасо, тювмуні-төвзис увлань...

Кор Павел өшинь розьё суйис юрсө, Титов сәні эз нин тыдав. Поезд петіс шыльыдінө, өддзөдіс мунөмсө. Медбөръя вагонсянныс лыйлісны пулемётысь.

Вылөдз качис сигнальнөй ракета, югдөдіс матігөгөрсө. Поезд сувтіс. Павел уси өшинь дорсьыс, тювгысис йөз вылө. Воссис вагон өдзөс. Кутісны выльысь лыддыны йөзөс.

Кор найөс став вагонъясысь лыддисны, вахтмейстер Крюгель докладывайтіс эшелонса начальник Краузелы:

— Господин гауптман! Эшелонын нинөм ыджыдторйыс эз ло. Кык вагонысь пышйисны йөз. Отисыс жугөдөмаөсь өдзөссө, а мөдас восьтөмаөсь өшиньсө. Воддза вагонас оз тырмы комын квайт морт, мөдас — өтик...

Краузе нюжөдчыштліс дышиника, скөрысь думыштіс: «Лыйлыны эськө ставнысө, но өд куш шойястө он вай... Гер-

маниялы сідзи оз тырмыны уджалысь кияс».

— Игнавны бурджыка да не сетны сёйны ни юны места вылө вотөдз!— шуис сійö вахтмейстерлы.— Небось кутасны төдны, порсьяс, код киынөсь öнi найö...

* * *

Буретш сійö здукас, кор Титов торъяліс вагон стен бердысь, кыліс лыйöм шы. А сэсся, кор нин Иван заводитіс котөртны насып пөлөн, кылісны выльысь лыйöмъяс.

Титов кымыньөн уськөдчис ыркыд му вылө. Бытьöккө ставыс вөлі лючки: некыт эз доймы. Но дыр куйлыны эз позь. Титов гөгөрвоис: тыдалө, вагонысь петны сылы удайтчис өтнаслы. Қоліс кызд позьö тэрыбджыка ылыстчыны тайö местасыс.

Қотөртіс дыр. Эз сыланьö, кодарö муніс поезд, а дзик мөдарö. Сьөлөмыс дась вөлі потны. Друг Титов кыліс понъяс-

лысь увтчөм да гөгөрвоис: матысмис сикт. Матыстчис матө керкаяс дорөдз. Меддорса керка водзас сувтіс, кутіс кывзысьны. Понъяс дугдісны увтчөмысь, гөгөр лои чөв-лөнь. Мый вөчны? Қодарө мунны? Ёна сюмаліс кынөмыс. Быть коліс пыравны кутшөмкө керкаө.

Друг дзик орчөн мөдіс таркакывны мотоцикл, сэсся бара увтыштіс пон. Титов уськөдчис бөрвыв, кутіс ылыстчыны деревнясьыс. Неылөдз мунөм бөрын кытчөкө крукасис кокыс. Қопыртчыліс. Вөлөмкө, капуста көчан. Нетшыштіс сійөс, чегис, заводитіс сейны.

Быттьөкө кынөмыс пөтыштіс, мунны лои кокныдджык. Мыйкө йылысь думайтны эз вөв окота. Прөстө муніс да муніс. Пельясыс сюся кывзысисны гөгөр: вермис өд лоны быдтор. Вермисны и фашистьяс паныдасьны. Ставтор вылө колө лоны дасьөн. Муніс муяс кузя, видзяс вывті. Сэсся пырис вөрө.

Сьөлөм вылас кокняліс. Вөрыд — векнин вөр. Титов казьтыштіс Сыктывкар

гөгөрсә вөръяс. Тані ставыс вөлі дзик мөд сяма, төдтөм. Петіс кутшөмкө прөсека вылө, коді кыссис водзө. Лолыштіс кокныдджыка. Но эз на удит вөчны и кызь воськов, кыдзи сылы паныд вөрсьыс друг петіс верзьөма. Тыдалө, верзьөма-ыд эз жө виччысь аддзыны тась мортөс. Сійө сюся видзөдліс Титов вылө, друг юаліс:

— Роч?

— Шуам — роч,— вочавидзис Титов.—
А тэ коді?

— Поляк.

Роч, украинскөй да польскөй кывъяс сорлавлөмөн верзьөмаыд висьталіс, мый видзө полицияысь дзебөм вөвъясөс. Титов муніс полякыдкөд вөв чукөр дінө. Сэні сиктса том йөз пукалісны бипур дорын. Титовөс тані вердісны, висьталісны, кыдзи да кодарө водзө мунны, медым не паныдасыны немецъяскөд. Сылы сетісны идзас шляпа, важ пинжак, истөг көрөб, бритісны. Öні Титов ачыс лоис том крестьянин кодь.

— Ылөдз мунны лоас, он во,— өлөдiс-ны сийөс.— Қольчы татчө, шойчышт. Дзебам.

Титов эз кольчы. Көть кыдзи, да колiс вуджны фронт вомөн, воөдчыны ас йөз дiнө.

Лун шөр гөгөр, кор Титов мунiс нин бура уна, сийө воис прөсека помө, кодi петiс идравтөм зөр му вылө. Салдат шуис шойчыштны, сэсся виль вынөн мунны водзө.

Вөрса встреча бөрад сьөлөм вылас лоис кокныдджык: өнi төдiс нин, мый абу өтнас. А көнкө өд эм дзонь страна. Ыджыд, вына. Сийөс некутшөм фашистьяс оз вермыны сувтөдны пидзөс вылө. И сийө ачыс, Иван Титов, тайө ыджыд Рөдинаыслөн пи, оз жө сувт пидзөс вылө, мед көть өнi и сьлөн оружиеыс киас абу. Лоас на и сы кын оружие.

Титов эз и казьявлы, кыдзи ойбыртiс. Садьмис сийө кутшөмкө шыысь. Надзөник кьпөдчис, видзөдлiс сыланьө, кытысь кылiс шыыс. Водзын зөр му кузя мунiс-

ны некымын фашист: няйтвиж френч-
ясаось, морос выланис быдөнлөн ошалис-
ны автоматъяс.

Титов видзодліс ас гөгорыс — оз-ө кы-
төнкө матын туплясьны изъяс.

«Ловйөн нинөм вылө ог сетчы,— ду-
мыштіс аслыс.— Тырмас сэсся: издевайт-
чисны нин».

Титов неылысь аддзис из ёкмыль, бось-
тіс сійос киас. Немецъяс мунісны эз сы-
ланыө, а мөдарө. Найө мыйкө йылысь
гораа сёрнитісны, сералісны да регыд
саялісны.

Иван ышловзис, шыбитіс бокө кисьыс
изсө. Сэсся кыпөдіс муысь идзас шляпа-
сө, пуктіс юр вылас да мөдөдчис водзө.

* * *

Гауптман Краузе матыстчис вагон до-
рын сулалысь пленнөйяс дінө, ылысянь
судзөдчөмөн кучкис пистолет воропнас
медся матын сулалысьлы веськыда ныр-
вомас. Пленнөйыд шатовмуні, но кок
йывсьыс эз усь.

— Но, кодї ещö кöсйис пышйыны?—
лёкысь горöдїс Краузе да гырдемöм
синъяснас видзöдлїс сы водзын кузь
радөн сулалысь йöз вылö.— Но, кодї?

— Ме!— кыліс гөлöс, и Краузе водзö
сувтїс неыджыд тушаа салдат. Гимнастёркаыс
сылөн вöлі некымынлатї косяссьöма,
чужöмыс няйт, тошсялöма, и сöмын
синъяссьыс позис лыддыны ыджыд
скөрлун.— И пышъя, он кö öнї ви менö,
фашистскöй гадина!

Тайö вöлі Соколов, кодöс Павел казав-
лїс нин водзджык.

Краузе, тыдалö, эз виччысь татшöм-
торсö: неуна весиг бөрвыв сетчис. Сэсся
надзöник лэптїс пистолетсö салдат чужöм
весьтö да лыйис.

— Ставнымöс он виöй!— удитїс на
усигмозыс шуны Соколов.

Быдторсö нин аддзылісны пленнöйяс
асланыс синмөн, но тайö лоёмторйыс
унаöс шогö уськөдїс. Эз, көнкө, öти морт
думышт: «Ставнымöс татшöмтор виччы-
сьö». А Краузе тэрмасьтөг бөр суйис

пистолетсö кобураас, югъялысь сапöг
нырнас чужийс кок дінас кымыньöн
куйлысь шойö, бергöдчис да пинь пырыс
сöдзöдіс:

— Тöдöй немецкöй офицерлысь кисö!
Сэсся гауптман вöчис кык воськов
водзö, сетіс приказ:

— Йöртöй вагонъясö тайö скöтсö!
Павел сулаліс орчöн Загорскийкöд,
курччаліс косьмöм парьяссö.

И сэки Краузе кöсийс ещö öтчыд пет-
кöдлыны ассьыс вынсö, выльысь юаліс:

— Сэсся, кöнкö, некод нин оз кöсий
пышйыны?

Трояновлы быттьö орсөн кучкисны. Вö-
чис воськов, сувтіс Краузе водзö, гаупт-
манлы синмас видзöдöмөн шуис:

— Ме кöсья пышйыны!

Сэки и унаөн мукöдъяс кутісны гор-
зыны:

— И ме кöсийи!

— И ме...

Кöсичаас мыйöнкö чорыдөн кучкөм
уськөдіс Павелöс кок йывсьыс...

Очмис сійö вагонын нин. Нуöдиé чу-
жöмбан кузяыс кинас: тыдалö, ставыс
вöли вир...

— Садьмин?— кылиé Загорскийлысь
гöлөссö.— Вельшöрö тэ тадзисö началь-
ник водзас... Кымынöс со нöйтисны... Ви-
дзыштны колö вынтö дай асьтö... А мö-
дарö кö, гашкö, и бурджык... Мед и
миянлысь вынсö аддзö...

Дыр на нуисны эшелонсö водзö. Воши
лунъясылөн и войясылөн лыдыс. Эше-
лонса начальник вöчис ас ногыс: куим
лун чöж некодлы эз сетны юны ни сёйны.

— Со найö тадзи кöсийöны велöдны
миянöс,— некод динö шыödчытöг шуис
Павел.— Бара рытыввылö, сэтчö, кöни
творитлисны Гёте да Шиллер, а öни сви-
репствуйтö сэни фашистскöй чума.

— Сидзи тай артмö, Павел Василье-
вич,— кызкö нежнöя вочавидзис Загор-
ский.— Нинöм, энö шогсьöй, кувнытö не-
кор абу сёр. Но кувны колö музыка да
бубенчикъяс шы улын. Тадзи шулисны
миян Русьын олысь йöз... Кувны кö, колö

сöмын гитлеровскöй сволочьяслы паныд тышын.

— Тöдан, Павел Васильевич, ассыд ловтö перйыны медся кокни, а тышын кö кувны — благороднö. Колö овны да тыш-касьны. Помнитан, кыдзи шуліс Николай Островский: «А тэ видлін тайö олөмсö венны? Тэ ставсö вöчин, медым мынтöд-чыны сылөн кöрт чепьясысь?!!»

Тэ эн видзöд ме вылö юалан синьясөн. Ме ачым тöда, мый тышкасьны да овны миянлы сьöкыд. Но невöляын олөм — тайö нин лоö победа шедöдөм вöсна тыш.

— Ёртьяс, Германия!— горöдіс кодкö, кор öдзöс костöд лыддис немецкöй кыв вылын вывеска станцияса здание вылысь. Тайö вөлөм Мюльберг кар.

Поезд регыд мысти сувтіс. Павеллөн сюсь синмыс кöрт туй визьянь километр кык сайысь аддзис вышкаяс. Тыдалö сійö и лагерыс, кытчö найöс вайисны.

— Аддзан, Павел, кыдзи скötös моз

мианӧс вайӧны,— шуис Загорский да сьӧкыда ышловзис.

Станция дінысь Троянов аддзис мудз да омӧльтчӧм йӧзӧс. Налӧн пемыдвиж гимнастёркаяс да кительяс вылын гырысь шыпасъяс: «SU»¹. Кыліс, кызди школадісны из мостӧвӧйӧ налӧн пу пыдӧса кӧмъясныс.

Вагонъяс пӧлӧн сувталісны конвоиръяс. Неуна бокинджык сулаліс Краузе, быттӧ любуйтчис аслас югъялысь сапӧгъясӧн.

Сэсся мыйкӧ дыра мысти вагон ӧшиньяс воссисны. Пемыд вагонъясӧ пырисны шӧнді югӧръяс.

Кодкӧ конвоиръяс пиысь горӧдіс:

— Петӧй ӧдйӧджык! Сувталӧй! Ӑдйӧ!

Муртса вӧрысь йӧз заводитісны чечавны вагонъясысь. Быдӧн зілісны ӧдйӧджык мынтӧдчыны пӧдтан жарсьыс. И сӧмын найӧ, кодъяс эз нин лолавны, колісны вагонъясӧ.

¹ SU — Совет унион (Сӧветскӧй Союз).

Пленнөйясөс сувтөдалісны радөн-радөн. Быд радын нель мортөн. Заводитісны нуны лагерлань.

— Юртө эн өшөд, Павел!— мунигмозыс Трояновлы шөпкөдіс Загорский.— Дерт, лоө сьөкыд. Зэв сьөкыд. Но ми кутам тышқасыны. Торъялам кө, кызкө зіль корсыны йитөд. Сэссия, видзөд ас гөгөрса йөз вылад бурджыка. Мед вывтисө оз...

Сёрнисө лоис орөдны — воисны лагерь ворота дінө. Джуджыд ворота вылын вөлі гижөма: «Сталаг 4Б». Улынджык немецкөй кыв вылын гижөма кушөмкө кывъяс. Бөрвылас нин Павеллы кажитчис, мый сэтчө гижөма Дантелысь «Божественная комедия» гижөдысь кывъяс: «Татчө пыригөн эновт став надеятө». Гижөд вевдорас, бордъяссө шевгөдөмөн, паськөдчөма көрт орёл.

Ворота воссис. Тойлалігтырйи йөз чукөрсө кутісны йөршитны ворота сайө, колючөй проволокаөн кытшалөм площадь вылө. Сэні пленнөйясөс виччысисны нин куимөн: френчаөсь, сапөгъясаөсь,

юр выланьс еджыд кубанкааоӥсь. Қиясаньс куимнанныс кутісны нагайкаяс. Ӧтилӧн шуйга сояс, гырджзасьыс вылынджык, вӧлі еджыд кӧртӧдтор, сы вылын гижӧд: «обер-полицай». «Вот кодъяс киӧ веськалім»,— кыз чужӧмъяса полицайяс вылӧ видзӧдігмоз думайтіс Троянов.

Қор йӧз неуна лӧнисны, дугдісны жӧдзӧмысь да чӧв ланьтӧмӧн мӧдісны виччысьны, мый лоӧ водзӧ, обер-полицайыд кытшовтіс синнас став йӧзсӧ, лӧптыштліс кисӧ, горӧдіс:

— Ми, немечьяс, колям тіянлы олӧм, но ті лоанныд сӧмын уджалысь вынӧн великӧй Германиялӧн. Ті кутанныд уджавны пӧсь петтӧдзныд. И эн думайтӧй бунтуйтны, скӧтинаяс! Миян тырмас вын сизим пӧв кусыньтны быдӧнӧс, коді сӧмын кыпӧдас гӧлӧс. И не сӧмын гӧлӧс. Коді весиг мыйкӧ думыштны вермас.

Пленнӧйяс сулалісны чӧв. Некод эз шыась обер-полицайлӧн горӧдӧм вылӧ. Сійӧ гырдемӧм синъяснас выльысь ви-

дзёдліс йөз вылө, матыстчис пленнөйяс дінө, кызкө тешкодя зэлөдчөмөн лёкысь горөдіс:

— Но, кодлы шуөны? Ме тиянөс, скөт чукөрөс, велөда. Ме тиянлы, роч порсьяслы, петкөдла! Аддзылад ті тані ассьыныд социализмнытө! Джагалөй ставныд!

Бура дыр видчис обер-полицайыд. А сулалысьяс чөв олісны.

— Ті тадзи?— шуис сэсся сійө да тшөктіс полицейскөйяслы:— Пывсьөдны порсьясөс! Да вежны паськөмнысө. Мед дас минут мысти ставныс вөліны баракъясынөсь. Аски асывводз — удж вылө. Ме найөс, скөтинаясөс, велөда дорын узылыны. Кутасны помнитны менө джагавтөдзныс. А тайө оз нин дыр мысти ло!

Обер-полицай гырысь воськовъясөн муніс ворота сайө.

— Тайөс ещө ми видзөдлам на!— кылө кодкө шуис надзөникөн, но сы вылө ёртъясыс сэтшөма видзөдлісны, мый мортыд пыр жө ланьтіс: нинөмла вөлі воөмөн тшөтш скөрмөдны охранасө. Ко-

ліс первой видзодлыны, тодмавны, мый
позьё вочны.

Недыр мысти нуодісны пывсянө. Кө-
дзыд пывсянын мыссьом бөрын, Павеллы,
кыдзи и мукөдлы, сетісны лөз гач, лёк
гимнастёрка, кокас пу башмак да нуодіс-
ны баракө. Баракө пыригөн сылы киас
сетісны нель пельөса жөч тор, көв йы-
лын, кытчө вөлі гижөма номер. Немець-
яслы Павел Трояновыд эз нин вөв. Вөлі
153866 номера военнопленнөй.

Кузь көв йылын номерьяс голяаныс
өшлисны и мукөд пленнөйяслы.

Заводитчисны лагернөй луньяс.

* * *

Иван Титов пыр муніс да муніс водзө
дзик өти думөн: кыдз позьё өдйөджык
вуджны фронт, писькөдчыны ас йөз дінө.
Гродно, Лида да Молодечно карьяс гө-
гөр виччысьөмөн кытшовтөм бөрын сійө
воис важ государственнөй граница дінө.
Коркө сійө тайө местаясас вөвльвліс
действительнөй служба дырйи. Но сэки

синтö радлöдiсны мича каръяс да сиктъяс. Öнi гөгөр куйлис сотчöм да врагөн талялöм му. Вöлисти öнi Иван гөгөрвоис став сьöлöмнас; кутшöм ыджыд шог да синва вайисны фашистъяс рöднöй му вылö, а эз сöмын сылы öтнаслы. Кыдзкö весиг и аслас шогыс та бöрын мöдiс кажитчыны ичöтджыкөн. Ок, кутшöма мукöд дырйиыс сылөн кыпавлис скöрлуныс! Но мый сийö вермис вöчны?

Титов некытчö эз сувтавлы, эз зиль öтлаасьны йöзкöд, кодъясöс корсюрö казьявлис то öтилаысь, то мöдлаысь. Кыдзкö сылы кажитчис, мый öтнасөнлы фронт вомөн вуджны лоö медся кокни. Ена виччысьöмөн петавлис сиктъясö, медым судзöдны нянь. И сэссия бара мунис водзö. Гөгöрын кыйкъялисны немецъяслөн карательнöй отрядъяс, куталисны вöръясын шöйтысь сöветскöй салдатъясöс.

Дырөн бөрö колины Минск да Борисов каръяс. Эз нин ылын вöв и фронтöдз. Öтчюд Титовлы киас сюри листовка. Сэни висьтавсис, мый быдөнöс, кодi ачыс сет-

час немецкӱй армиялы, лоӱ пасьтӱдӱма да кӱмӱдӱма, а война бӱрын лӱдзасны гортас. И сӱн жӱ — пропуск кодь мыйкӱ. «Тӱда ме тӱянӱс, кыдзи кӱмӱданныд да пасьтӱданныд», — скӱрысь думыштӱс Титов.

Мӱд листовкаын висьтавсис партизанъяс йылысь. Немецкӱй командование юӱртӱс, мый вӱрысь быд аддзӱм мортӱс мӱдасны лыддыны партизанӱн, лыйласны. «Молодечьяс! Сидзкӱ, прамӱя дӱз-мӱдчӱны, тадзи кӱ немецкӱй командование сӱрнитӱ партизанъяс йылысь», — думсьыс радлӱс Иван. А, гашкӱ, и сылы ни нӱмла зӱльны вуджны фронт вомӱн? Колӱ прӱстӱ корсьны партизанъяссӱ да ӱтувтчыны накӱд. Но — босьтасны-ӱ?

Титовлы тӱд вылас усины лейтенант Стрелец йылысь пленнӱйяслӱн висьтъяс-ыс. Сылӱн нимыс вӱлі тӱдса враглӱн оккупируйтӱм областьясса уна районъясын. Сийӱ пӱ, гестапоса офицерлӱн формаӱ пасьтасьӱмӱн, мездӱма пленнӱйясӱс, Ровноын виӱма пӱ фашистскӱй гаулейтерӱс,

писькӱдчылӱма пӱ Житомирын Гитлер-
лӱн ставкаӱ.

Кутшӱм романтической оролӱн ӱвти
лейтенант Стрелец образсян. Иван эз
тӱд, мый унджыкыс тайӱ висьталӱмьясас
партизаньяслӱн командир йылысь — ле-
генда али збыль, но сийӱ помнитис, мый
тайӱ морт йывсьыс пыр сӱрнитлисны сы
дорӱ уважениеӱн. Тӱдчӱдлисны, мый сийӱ
архангельской вӱвлӱм помор, а помав-
лӱма Москваын иностранной кывъяс
кузя институт.

ӱти войӱ Титов нем виччысьтӱг зура-
сис колючӱй проволока радьясӱ. И дзик
орчӱн кылис немецкой сӱрни. Зӱв ӱдийӱ
уськӱдчис муас, ланьтӱдчис, кутис кыв-
зысьны. Тыдалӱ, сӱрнитысьясыс вӱлины
патрульяс. Найӱ сӱсся регыд мунисны
водзӱ.

Титов чеччис, видзӱдлис гӱгӱр. Буракӱ,
тані, проволочной заграждение саяс,
вӱли немецьяслӱн горючӱй склад: ӱвти
бензин дукӱн, маслӱясӱн. Титов радлис
нин, мый ставыс артмис сӱтшӱм бура, не-

код эз казьяв сійӧс. И буретш сэки дзик орччӧн кыліс понлӧн увтыштӧм. Тыдалӧ, понйыс котӧртис сылань. Быть лои чеччыштны проволочной заграждение вомӧн, дзедьсыны бензин бӧчкаяс сайӧ.

Вылӧ качис ракета, югдӧдіс матігӧгӧрсӧ. Кажитчӧ, ставыс ловзис, мӧдіс вӧрны. Дерт нин, ӧні аддзасны Титовӧс, кыскасны тась, а, гашкӧ, и понъяс таӧдз на косявласны сійӧс. Вӧчны вӧлі нинӧм. Титов кималасӧн корсис бензин бӧчкалысь пробкасӧ, бергӧдлӧмӧн восьтіс сійӧс. И кор бензин ыльӧбтіс муӧ, тіралан чуньяснас кыскис зепсьыс истӧг кӧрӧб, чиркнитіс истӧгсӧ, инмӧдіс бензинӧ...

Сэсся Титов нинӧм нин эз кывлы. Эз кывлы, кыдзи сылань котӧртисны немецкӧй салдатъяс, кыдзи недыр мысти взорвитчис первой ӧти бензин бӧчка, сэсся мӧд, коймӧд...

Иван Титов вӧчис, мый вермис... Кӧть и ичӧтиктор, но вӧчис. Сійӧ эз сувт пидзӧс вылӧ, эз кевмысь врагъяслы.

Колис лагерын өти лун, мөд... Тани быд лун өткодь кузьось да съокыдось. Виис мортос шонди петомсянь да шонди лэччытөдз кыссысь уджыс, виис тшыгъя-лөмыс. Ставсө тани вөчисны сы вылө, медым вины да пөдтыны мортос, не сетны сылы кад не сөмын думыштыны мыйкө йылысь, гортсаяс йылысь, чужан места йылысь, но и аддзыны мыйкө ас гөгөрсьыд, казьявны мортос виысь съокыд удж кындзи.

Удж вывсянь Троянов муртса вермывліс кыссыны аслас нар вылөдз.

Но и сэки Павел заводитліс кыпөдны ловсө аслас выль другьяслысь:

— Ти төданныд-ө миян йөзлысь төдчанаторсө?— шульвліс сійө.— Найө сэтшөм йөз, кодьяс некор оз жалитлыны ассыныс олөмсө мича будущөй вөсна. А олөм, кыдзи төдса,— мортлөн медся донатор. Со и миян вылө уси зэв съокыд испытание: ассыным олөм жалиттөг тышкась-

ны пленё сюрём бёрын. Миянёс пёртёны тшыг пемёсьясё, а ми век жё йёз, да колям йёзён помёдз. Морт! Тайё збыльысь юргё гордоя. Мед видзёдёны сы вылё да шензьёны. Мед ставныс аддзёны, мый ми огё янёдё ассыным фронтвывса вокьясёс. И шуёма кё пёгибнитны миянлы, колё пёгибнитны сувтсён, тышын, а не пидзёсчаньён, тышкасьтөг.

Став вылё өвтыштис мыйкё тёдса, матысса кодь, кыліс рёднёй, сьёлёмсянь шуём кыв, коді эскөдіс чувствояссё мучитём да невёляын олысь йёзлысь. Найё аддзисны Трояновын сэтшём мортёс, коді налы вайис тыш вылё ызйёдысь би.

Аслыс Павеллы вёлі медсьёкыд сыысь, мый сійё торъяліс Загорскийкөд. И көть кыдзи эз зіль, йитчыны некыдз эз вермы. Төдіс, мый Иван Петрович кытёнкё матын, өтчыд весиг аддзыліс удж вылё нуигён, но сёрни панны эз вёв позянлуныс. Павел нинём эз төд и Титов йылысь. Вермис-ө сэки сійё помёдз пышйыны? Кёні өні сійё? Гашкё, удайтчис вуджны

фронт вомён да тышкасьö нин враглы паныд?

Эз тöд Павел и сы йылысь, мый сійöс асьö виччысьöны гырысь испытаниеяс.

Отчыд Троянов удж вылас доймис. Быттьökö ыджыд дой эз и вöв, но войнас веськыд кокыс пыктіс. Кок чуньясыс лöзöдісны. Асывводзнас, кор найöс мöдісны петкöдны удж вылö, Троянов эз вермы сулавны кок йылас.

— Тэ мый куйлан?— уськöдчисны сы вылö кык охранник.— Уджавны он көйы?

— Оз вермы сійö,— висьталісны налы.— Висьö.

— Висьö? А няньсö сёйны көйö?

Трояновöс сойбордйöдыс кыскисны джоджö, сэсся и улича вылөдз. Кык час мысти сійö куйліс нин кöдзыд карцерын цементнöй джоджын. Став тушанас сырмис — сэтшöма кучкалісны нагайкаясөн, зурйöдлісны кулакъясөн, чужъялісны. «Пом, тыдалö, менам олöмлы воис»,— карцерын куйлігөн думайтіс Павел.

Сылы öнi кажитчö ставыс вöли веськодь. Жаль сöмын, этша на удитiс вöчны, кокниа сюрис врагъяс киö. Эз, сийö эз нин сэтшöм кокниа шед: удитiс гоз-мöд фашистöс мöдöдны мöдаръюгыдö. Но колiс эськö, мед олöмыс сылөн помасис эз танi, фашистскöй пленын, а ас чужан муын. Дерт, сийö и танi оз копыртчы некод водзын, пиньяснас и гыжъяснас, но мöдас тышкасьны. Ок эськö, аддзысьлыны ещö Иван Петрович Загорскийкöд.

Троянов тöдiс, мый сийöс öнi виччысьö: нуасны газокамераö, пöдтасны, а сэсся сотасны крематорийын. Газокамера йывсьыс Павел унатор нин кывлiс. Тöдiс: сэнi быд лун виöны уна дас мортöс. И öдвакö сылы, Павел Трояновлы, удайтчас мездмыны сыысь.

Карцерын вöли сöмын öти неыджыд розь пöтöлöк бердын. Судзöдчыны сыöдз либö кайны да видзöдлыны вöльнöй светсö, некыз эз позь. Дзик öтнас. Кытшалöны зумыш стенъяс. Кöдзыд цементнöй стенъяс. Ачыс дзик пасътöм. Весиг дö-

рём-гачсö сылысь мырддисны да косявлісны. Эк, зверьяс!

Код төдас, мыйта коли кадыс, кодöс муртса-муртса позис төдны пötөлökбердса неыджыд розьöd луньюгыд пырём серти. Гашкö, колис лун. Гашкö, и кык. Тыдалö, нарошнö Трояновöс некод эз видзöдлыв. Нарошнö, көнкö, колисны ас кежсьыс. Нинём: Павел оз йöймы!

Но вот, кылö воисны и сылөн карцер öдзöс дорö. Кыкөн либö куимөн. Гольс-муні иган, öдзöс воссис.

— Пет!— шуисны сылы.

Павел петіс, сійöс тойыштісны водзö. Бөрвылас сулалісны куимөн.

— Мун!— тшöктісны.

«Кодарö тон нуасны?»— мунігмозыс думайтіс Троянов. Гөгөрвоис пыр жö — газокамералань. «Пышйыны. Уськөдчыны öти вылö, и пышйыны. Мед, колökö, виасны»,— думайтіс Павел.

Газокамераысь буретш кыскалісны шойяс. Троянов видзöдліс конвоирьяс вылö.

— Отсав тшӱтш кыскавнысӱ,— шуисны сылы.— Тэ кодсӱ татчӱ унаӱс на ваясны.

Троянов пырис газокамераӱ, быттьӱ ловъявыввсыс гуӱ чеччыштіс. Йӱршитчис пельӱсӱ да видзӱдӱ, кызди зондеркоманда кыскалӱ шойяссӱ. Друг кодкӱ локтіс сы дӱнӱ, шӱпнитіс:

— Вод тшӱтш... Ми тӱнӱ кокӱдыд жӱ кыскам. Тӱнӱ Иван Петрович тшӱктіс петкӱдны тась. Паськӱмыд кузовас, дӱнад лоас...

Троянов первойсӱ нинӱм эз гӱгӱрво. Кутшӱм Иван Петрович? Мыйла водны?

Но мортыд мӱдысь локтіс, выльысь шӱпнитіс:

— Мый виччысян? Вод, мися, кӱсьян кӱ овны...

Ставыс артмис дзик вӱтын моз. Павел водіс джоджӱ, и здук мысти сӱйӱс кыкисны кокӱдыс ортсӱ, шыбитісны машина кузовӱ, морт шойяс пӱвстӱ... Трояновлӱн заводитліс бергӱдчыны юрыс, гудыртчыны вежӱрыс, горш дорас кыпавліс

кутшөмкө курыд комөк, но мырдысьөн кутіс асьсө, ланьтөдчис. «Мый лоны — мед лоас»,— шуис аслыс. И кутіс виччысьны, мый лоө водзө.

Кузовө шыбитісны ещө некымын шой. Троянов лыддис аслас сьөлөмлысь гораа тіпиктөмсө, кажитчис, сійө дзикөдз чечыштас ортсө. Сэсся заводитіс шыавны мотор, кывлісны кодьяслөнкө гөлөсьяс, и мыйкө дыра мысти машина вөрзис. «Збыльысь өмөй ме мыні смертиысь?»— думайтіс Павел.

Ворота дорын машина сувтіс, кутшөмкө салдат видзөдліс кузовө, лэптыштіліс брезентсө, сэсся бөр лэччис. Машина петіс ворота сайө. «Төдө-ө шофёрыс, мый сылөн машинаын ловъя морт? Мый вөчны водзө?»

Троянов кыпөдыштіс юрсө, гөгөр видзөдліс. Аскөдыс орчөн пемыдсьыс аддзис неыджыд ёкмыль. Век на нинөм прамөя эз гөгөрво. Кыдзи ставыс тайө артмис? Коді вөлі сылы шөпкөдысьыс? Коді кыскис сійөс кокөдыс душегубка-

ысь? Кодъяс шыбитісны кузово? Тайос Трояновлы, тыдало, некор не тодмавны. Отитор воли гогорвоана: тайос вочны вермисны сомын другъяс. Но кодъяс найо?

«Оз позь воштыны кадсо. Коло пасьтасьны», — тэрыба визъяліс юрас. Надзоник петіс брезент улысь, матыстіс ёкмьльсо, разис сійос. Сэні и збыльысь воли паськом — гач, кутшомко куртка, кепка, комкот.

Машина муніс водзо. Бөрын ни водзын некод эз тыдав. Павел одйо пасьтасис, и кор машина оти чой паньд кайигон надзмодліс муномсо, чеччыштіс борт вомон. Кажитчо, бертовтчис кокыс, но сійо весиг эз кыв доймомсо, копыртчыштомон кутіс ылыстчыны туй дінысь. Помнито на Павел, кьдзи туй вылын югнитіс югыд би, мунісны ещо машинаяс, но сійо пыр котортіс и котортіс водзо.

Мыйко дыра мысти воис ляпкыдик вөр дорө. Мед коть пуясыс и волины коньөр кодьюсь, но тайо век жо воли вөр,

көні позис дзедьсыны. Павел өддзөдіс
воськовсө, и регыд мысти пырис вөрө,
дзедьсис кыдз пу раскө да пыр жө унмов-
сис сьөкыд унмөн.

Сылы вөлі дзык веськодь сійө, мый өні
вөчисны лагерын немецьяс, кытысь сә-
тшөм кокниа удайтчис пышйыны, мез-
дысьны смертысь.

А лагерын кыптис ыджыд шум. Кыдз
нө: пышйис морт. И кытысь? Газөвөй ка-
мераысь. Сэтысь ни өти морт на ловйөн
эз петлы!

Мыйөн машина мунис да мунисны
тшөттш зондеркомандаса уджалысьяс, ла-
гернөй охрана казяліс: воши тшөттш и
карцерысь вайөдөм пасьтөм мортыд.
Кытчө сійө вермис лоны?

Звөнитисны комендатураө.

— Мый?— скөрысь вочавидзисны сә-
сянь.— Кыдзи пышйис? Миян некод на
эз вермыв пышйыны. Корсьөй.

Дежурнөй, тыдалө, шыбитис весиг
трубкасө: нинөм сёрнитны лоны вермы-
төмтор йылысь. Сійө ачыс тшөктис мө-

дөдны газөвөй камераысь шойяссө крематорийö. Эз жö сэтчö кавшась ловъя морт. Сідзкө, сэні сотасны и ловъя мортсö. Мед лоас сідз. Ачыс корсис аслыс дженьыдджык туй.

Газөвөй камерасянь звөнитісны мөдысь: морт некысь абу сюрöма.

«Ок, чöрт!— ёрччыштіс дежурной.— Тадзтö абу дыр и веськавны фронт вылö».

Звөнитіс крематорийö. Машина сэтчö абу на воöма.

Лагерь весьтын лёкысь горöдіс сирена. Заводитісны баракъяс костöд котравны охранникъяс. Та йылысь доложитісны лагерса комендант штабс-фельдфебель Ханс Липемлы. Сійö зэв скöрысь кутіс звөнитны телефонöн.

А сэк кості Троянов муніс век водзö. Регодик мысти Павел петіс нейджыд полустанокö. Сэні сулаліс состав. Платформаяс вылын брезентöн вевттьöм кушöмкö машинаяс. Троянов видзöдліс гөгөр: некөн некод эз тыдав. Павел

матыстчис состав дінө, кайис өти плат-
форма вылө, пырис брезент улө, ланьтөд-
чис. Платформа вылын брезентъясөн
вевттёмөн вөлөм нуоны танкъяс.

Кык лун да вой Павел Троянов муніс
брезент улын асыывывлань. Сюмаліс кы-
нөмыс. Вөлі көдзыд.

Өтчид состав сувтіс эрд вылө. И кор,
недыр сулалөм бөрын, поезд мөдіс бөр
вөрзыны, Троянов петіс брезент улысь
да платформа вывсянь исковтіс муө.
И, тыдалө, сійөс век жө казялісны воддза
вагонсянь: состав пөлөн кутісны лыйлы-
ны пулемётысь. Но поезд эз нин сувт —
муніс водзө. Троянов сөмын кыліс, кыдзи
мыйкө друг ёнтыштіс мышкас, быттьө
чорыда кучкисны. «Тыдалө, ранитчи»,—
удитіс думыштны, а сэсся воши садьыс.

Очмис сійө кутшөмкө сарайын, сьөкы-
да ышловзис, ружтыштіс. Пыр жө вос-
сыліс сарай өдзөс, и сы дінө локтіс морт.

— Көні ме?— юаліс Павел.

— Эн пов, другъяс ордын,— вочавидзисны сылы.

* * *

Иван Петрович Загорскийлөн заводитчисны лагерысь лагерö ветлөдлөмъяс. Төдөмысь, сылысь эз юавны, көсийö сийö али оз. Прөстө казялісны регыд быд лагерын, мый тайö мортсö абу кокни сувтөдны пидзöс вылө, и абу сэтшөмъяс лыдысь сийö, кодъяс асьныс регыдөн да кокниа чермунасны, и зільлісны öдийöджык мынтөдчыны сыысь. Весиг аслыс Загорскийлы мукөд дырйиыс гөгөрвотөм вөвлі: мукөдөс важөн нин котшнитісны кутшөмкө ногөн, а сийөс оз вөрзьөдны. Тыдалө, лагерной охранникъяс полісны сылөн синъясысь.

1942 вося төв Германияын вөлі көдзыд. Лёкиник паськөмнад эз вөв кокни, көть эськө и гырысь морозъяс эз вөвны. Но көть кытчö оз веськав, Иван Петрович быдлаын медся войдөр зільліс ас гөгөрыс котыртны верной йөзöс, кодъясöс

сійӧ кыдзкӧ кужліс кокниа аддзыны. Та-
йӧс сійӧ лыддьыліс аслас, кыдзи комму-
нистлӧн, медся ыджыд могӧн. Дерт, сы-
лӧн некутшӧм документ сьӧрсые эз вӧв.

Воас кад, и сійӧ кужас, мед сӧмын
ловйӧн коляс, докажитны кӧні ковмас,
мый сійӧ нинӧмӧн эз няйтӧсьт комму-
нистлысь сӧвестьсӧ. Дерт, вӧлі пленын,
но ӧд сійӧс пленас босьтісны сьӧкыда
контузитчӧм бӧрын. Сійӧ кыкысь нин за-
водитліс пышйыны, но эз вермы. Мукӧд-
лы отсалас, а ачыс коляс. Со Иван Ти-
товлы отсаліс, Трояновӧс смертысь мез-
діс. Иван Петрович чорыда эскис: мед
кӧть и Титов да Троянов эз воны асла-
дорӧдз, но найӧ кокниа эз сетчыны:
кулісны кӧ, кулісны боецъясӧн. И Загор-
ский эз шогсы сысь, мый эз удайтчы
пышйыны аслыс, петны колючӧй прово-
лока сайсьыс: тані сійӧ отсалӧ вылын
кутны юрнысӧ уна том йӧзлы, кодъяслы
татшӧм сьӧкыд кадас колӧ сьӧлӧм се-
тысь.

Тані, Мюльбергын, Иван Петрович случайнӧ тӧдмаліс гитлеровскӧй палач Гимлерлӧн циркулярнӧй письмӧ йымысь, кӧні тшӧктыссис дугдывтӧг выльысь и выльысь сорлавны лагерса йӧзлысь составсӧ, медым пленнӧйяс костын эз артыны топыд йитӧдъяс, медым эз котыртсывны тайнӧй группаяс.

Та вӧсна немецъяс котырталісны Германия пасьта уна лагерьяс. И разнӧй лагерьясын лоины уна сюрс морт.

Кызкӧ Загорскийлы удайтчис кывзыны миян воштӧмъяс йылысь пленнӧйяс костын сёрни:

— Агрессорлӧн уськӧдчӧмыс,— висьталіс ӧти тӧдса кадрӧвӧй офицер,— сӧветскӧй войскалы лои дзик нем виччысьтӧм. Гитлеровецъяс вӧчисны миянлы ыджыд урон. Тайӧ торйӧн нин трагичнӧ, кор уськӧдан тӧд вылад сэтшӧмтор, мый кадрӧвӧй войскаясӧс вӧлі укомплектуйтӧма Рӧдиналы преданнӧй воинъясӧн. Правильнӧя кӧ вӧлі веськӧдлӧма войскаяслӧн действиеясӧн, агрессор эськӧ война-

лөн первой этапын нин пöлучитіс чорыд отпор.

Иван Петрович тайö жö сёрниысь гөгөрвоис, мый эм Военнопленнöйяслөн Братскöй Союз (В. Б. С.), коді гусьон веськөдлө фашистскöй рабстволы паныд тышөн.

Мюльбергысь Загорскийöс вуджөдісны Кюстринö, сэсянь Берлин дорö матö, көні сійö веськаліс железнодорожнöй рабочöй командаö. Лун-лун найö грузитісны фронтлань мунысь вагоньяс. Мый сöмын эз мун сэтчö: снаряжьяс, орудиеяс, продовольственнöй тöварьяс.

Унаысь ковмывліс грузитны автомашинаяс. Сэки Загорскийкөд öтлаын уджалісны Виктор Буров Вöлөгдаысь, Борис Михайлов Москваысь, Фёдор Челлак Украинаысь, Пётр Бессонов да Алексей Осипов Сыктывкарысь. Йöз ставныс вöліны надёжнöйöсь, вернöйöсь. И эз öтчыд кодкө да кодкө кисьт лыа автомашинаяслөн бензобакö, а мукөд дырйиыс и

моторлөн цилиндрө. Эз өти машиналысь бокö шыблавны и свечаяссö.

Дырөн, тыдалö, гестапо заводитис мый-сюрö гөгөрвоны. Первойөн корисны допрос вылö Борис Михайловöс. Но сийö нинём абу висьталöма. Корлисны допрос вылö и Иван Петровичöс. Бертлөдлисны уна ногөн, грөзитчисны, көсйысисны уна-тор, висьталас кө ставсö, но Иван Петрович, төдöмысь, кутчысис бура. Дертнин, гестаповецъяс весиг чайтнысö эз вермыны, мый кианыс найö кутöны буретш сийöс, кодi веськөдлö лагерса диверсантъясөн. Корлисны гестаповецъяс и Бессоновöс да Осиповöс, но найö нинём жö абу висьталöмаöсь, көть и нöйтöмаöсь кыкнаннысö садь быртөдзныс.

И век жö найö ставөн сюрисны. Налы öтчид ковмис грузитны вагонъясö снарядыяс. Первойсö ставөн шуисны öткажитчыны уджалöмысь, но думыштисны да петисны удж вылö. Некод эз төд стöча, мый вöчисны вагонас Буров да Ми-

хайлов, но вагоныс орча станцияын
взорвитчöма. Став составыс сотчöма.

Мöд луннас баракысь кыскалісны став-
нысö, кодъяс грузитісны вагонö снарядъ-
яссö, да нуисны гестапоö. И көть кутшö-
ма эз нöйтны быдөнöс, некод нинöм эз
висьтав.

Кор найöс сэсся петкөдісны лыйлыны
да став пленнöйяс син водзö сувтөдісны
радөн-радөн дас кык мортöс, Иван Пет-
рович удитіс на горöдны:

— Ставнымöс он лыйлöй! Миян Рөди-
на оз вунöд миянöс! Долой фашизм!

Автоматъясысь лыйöм орөдіс Иван
Петровичлысь кывъяссö. Тэрмасьöмөн
луйлісны гитлеровецъяс сöветскöй сал-
датьясöс. Найö и збыльысь вöліны сал-
датьясөн, көть пленынöсь: найö öд мед-
бөръя здукөдз тышкасисны миян Рөдина-
лөн врагъяскөд.

* * *

Эз кокниа шед сöветскöй йöзлы веро-
ломнöй враг вылын победаыс. Но воис и
сийö луныс, кор Победалөн флаг кутіс

дöлавны Берлин шöрын фашистскöй рейхстаг вылын. Берлин штурмуйтэсьяс лыдын вöли и Павел Троянов. Сийöс бурдöдисны сöветскöй патриотэяс да мöдöдисны партизанэяс динö. Кор Сöветскöй Армия мездис Белоруссия, Троянов бөрсувтис сöветскöй салдатэяс радö.

Витебсксянь Берлинöдз мунигчöж сийöпыр да быдлаысь корсис асьыс другэяссö, но нинöм эз вермы тöдмавны.

И сöмын гортас воём бöрын нин тöдмалис: Иван Титовлөн бать-мамлы волöма пиыслөн медальон. Сийöс аддзöмаöсь Западнöй Двина юбокса Велиж кар динэсь, кытөн взорвитчöма немецкöй бензоохранилище. Фашистэяслөн шойяскöд орччөн вөлöма и лёк паськöма сöветскöй мортлөн шой. Медальонсö Титовлысь видзöмаöсь война чöж да мöдöдöмаöсь бать-мамыслы бөрвылас нин.

Гроссбеерен станцияын Загорскийöс да сылысь ёртэяссö лыйлём йылысь Троянов тöдмалис ещö сёрөн, кор гортаныс воис-

ны найö, кодъяс кывлісны Иван Петровичлысь бөръя кывъяссö.

Коммунист-патриотлön сьöлöмысь пектан кывъясыс сетöмаöсь сьöлöм да сьökыд испытаниеяс вуджны вын уна мортлы.

Вот, пöжалуй, и ставыс, мый ме кöсий висьтавыны йöз йылысь, кодъяс эз сувтны пидзöс вылö врагъяс водзын, вылын нуисны сöветскöй патриотъяслысь ним, и нэм кежлö колысны миян паметын.

Бөръя кадö лои лэдзöма уна книга сы йылысь, кызди сöветскöй йöз тышкасысны гитлеровскöй лагерьясын. Мемориальнöй музейлön ветымын метр судтасынь бухенвальдскöй кöлököллön звöныс быд лун казътывлö уна сё сюрс мортöс ловйöн сотöм да лыйлöмъяс йылысь, чуксалö ёнджыка тышкасыны став мирын мир вöсна, став народлön шуд вöсна да казътылö кольöм войналön ужасъяс йылысь. Уна пöв прав немецкöй пастер Нимллер аслас öтветын, кодi уна во чöж пукаліс Бухенвальдын мекöд öтлаын. Сылысь

юалисны: «Вөлі-ө сэтшөм ужаснө лагерьн, кыдзи сы йылысь гижоны?»— сійө вочавидзис: «Эз, эз вөв сэтшөм ужаснө, вөлі сё пөв ёнджыка ужаснөйджык!»

Доблестнөй сөветскөй войска мездисны фашистскөй невөляысь уна миллион йөзс, найө спаситисны мир гитлеровецъяс-лөн садизмысь да средневековөй рабствоысь. Ми радось пасйыны, мый уна миллион йөз, кодъяс веськалисны фашистскөй пленө да вөліны врагөн оккупируйтөм территория вылын, эз сувтны пидзөсчаньяс вылө, а тышкасисны. Тайөн найө гижисны историяө героическөй лист бокъяс.



Борис Пантелеймонович Тентюков

ОНИ НЕ ВСТАЛИ НА КОЛЕНИ

Документальная повесть

на коми языке

Оформление С. А. Добрякова

Редактор *С. Морозов* Техн. редактор *И. Оплеснин*
Корректор *Р. Колцун*

Сдано в набор 28/V-1962 г. Подписано к печати
23/VI-1962 г. Формат $60 \times 84^{1/32} = 0,875$ бум. л. 1,75 печ.л.
(Уч-изд. л. 1,15). Тираж 1000. Заказ № 2336.
Ц00881. Коми книжное издательство. Дом печати.
Цена 3 коп.

* * *

г. Сыктывкар, Республиканская типография
Полиграфиздата Министерства культуры Коми АССР.

3 кӧп.

Коми книжнӧй издательство
1962